

**Nioqqutissat ilisarnaataat pillugit inatsisip aamma inatsisit allat
allanngortinneqarnerat pillugu inatsisit Kalaallit Nunaannut
atuutilersinneqarneri pillugit peqqussut**

UAGUT MARGRETHE AAPPAAT, Guutip Saammaanneragut Danmarkip Dronningia, matumuuna nalunaarpugut:

Inatsit nr. 1201, 27. december 1996-imeersumi § 4-p nassatarisaanik, nioqqutissat ilisarnaataat pillugu aamma eqqartuussisarnermi inatsisip inatsisip allanngortinnerinut tunngasoq aamma (TRIPS-aftalen, Trademark Law Treaty il.il. piviusunngortinnera) inatsit nr. 412, 31. maj 2000-meersoq, nioqqusianik nutaanik illersuineq pillugu inatsisip, nioqqutissat ilisarnaataat pillugu inatsisip, ilisserusiat il.il. pillug inatsiip, allalersuisarneq pillugu inatsisip aamma naasunik nutaarsiassat pillugit inatsit (bioteknologi atorlugu nassaareqqaarneqartut illersorneqarnerat, ilanngunnagilli suliani takunnissinnaatitaanermut il.il. tunngasut), inatsit nr. 1258, 20. december 2000-imeersoq, nioqqusianik nutaanik illersuinnermut inatsit aamma nioqqutissat ilisarnaataat pillugu inatsisip allanngortinneqarneri (fuldmægtigip, administrationip misileqqinneqarnerinut il.il. piumasaqaatit allanngortinneri), inatsit nr. 1430, 21. december 2005-imeersumi § 9, imm. 1-2 nioqqusianik nutaanik illersuinnermut inatsisip, piginneqqaartussaannermut inatsisip aamma inatsisit allat allanngortinnerinut tunngasoq (EF-direktiv 2004/48/48 ataasiakkaat piginnaatitaaffiisa piviusunngortinnissaasa atuutsinnissaannut tunngasoq), inatsit nr. 538, 8. juni 2006-imeersumi § 110 imm. 4 eqqartuussisarnermik inatsisip aamma inatsisit assigiinngitsut allat allanngortinnerinut tunngasoq (Politiit – aamma eqqartuussiviit pillugit iluarsaaqqinneq) aamma inatsit nr. 1404, 27. december 2008-meersumi § 10, imm.2 nioqqutissat ilisarnaataat pillugit inatsisip, pillaaarneq pillugu inatsisip, radiomik aamma fjernsynimik ingerlataqarneq pillugu inatsisip taamatullu inatsisit allat assigiinngitsut allanngortinneqarnerinut tunngasoq (Nioqqusiat assiginik unioqqutitsisumik pilersitsisarnermut akiuniarnermik annertusaaneq) aalajangerneqarpoq, inatsisit Kalaallit Nunaannut atuutissasut, taamaalilluni nioqqutissat ilisarnaataat pillugu inatsit peqqussut nr. 856, 16. december 1991-imeersukkut Kalaallit Nunaannut atuutilersinneqartoq, qulaani allannguutit taaneqartut 1. juli 2010-imeersut ilanngullugit Kalaallit Nunaannut atuutissasut ima oqaasertaqarlutik:

Kapitali 1

Aalajangersakkat nalinginnaasut

§ 1. Inatsimmi matumani aalajangersakkat malillugit inuit suliffeqarfiillu nioqqutissanut ilisarnaatinik piginnittuulersinnaapput (nioqqutissat ilisarnaataanik piginnittussaaneq). Nioqqutissat ilisarnaataanni pineqarput nioqqutissanut imaluunniit kiffartuussutinik tunniussisarnermi suliffeqarfimmi atorneqartartut imaluunniit atornissaannut siunertarineqartut immikkut ilisarnaataat.

Nioqqutissat ilisarnaataasa ilusaat

§ 2. Nioqqutissat ilisarnaataat naqinnernik sunilluunniit suliaasinnaapput, suliffeqarfiit allat nioqqutissaataannit imaluunniit kiffartuussutaannit suliffeqarfik

immikkoortinneqarsinnaalluni, ilusilersuinikkullu naqinneqarsinnaasut, pingaartumik makkunatigut

- 1) oqaatsit oqaatsillu ataqatigiinneri, ilaallutik oqariaatsit, inuit aqqi, suliffeqarfiup taaguutai imaluunniit illuutit aalaakkaasut taaguutaat,
- 2) naqinnerit aamma kisitsisit,
- 3) titartakkat assiliillunilu nuutsitat, imaluunniit
- 4) nioqqutissap ilusia, atortorissaarutit imaluunniit poortuutit.

Imm. 2. Nioqqutissat ilisarnaataannik naqinnernik pissarsineqarsinnaanngilaq, nioqqutissap ilusiinnaanik ilisarnaatitalinnik, nioqqutissap immi ilisarnaataaniinaq malitsigisaqartunik, nioqqutissap ilusilersornera, teknikkikkut angusaqarnissamut pisariaqartitamut, imaluunniit iluseq atorlugu, taamaalilluni nioqqutissaq annertunerungaatsiartumik naleqalerneranik kinguneqartumik.

Nioqqutissap ilisarnaataanik pissarsineq

§ 3. Ima iliornikkut nioqqutissap ilisarnaataanik pissarsisoqarsinnaavoq

- 1) inatsimmi matumani malittarisassat malillugit nioqqutissanut imaluunniit kiffartuussutit nalunaarsuinnerut pineqartumut nioqqutissap ilisarnaataanik nalunaarsuinikkut
- 2) nunami maani nioqqutissanut imaluunniit kiffartuussutinut nioqqutissap ilisarnaataanik atuilernikkut, tassa nioqqutissap ilisarnaataanut atulersimasumut, taakkulu ataavartumik atorneqalissallutik.

Imm. 2. Atuinikkut nioqqutissap ilisarnaataanik piginnittusaaanermik pilersitsisoqarsinnaanngilaq, ilusia malillugu nalunaarsorneqarnissamut itigartinneqarsimappat.

Imm. 3. Ilisarnaat atorneqalernermini pisariaqartitsit immikkuullarissuunngippat, pilersitsineq aatsaat pisinnaavoq, ilisarnaatip atorneratigut immikkuullarissutsip pilersinneqarnera eqqarsaatigalugu.

Nioqqutissap ilisarnaataanik piginnittusaaanerp imarisai

§ 4. Nioqqutissap ilisarnaataanik piginnittusaaatitaasup nammineq akuersitinnani allat ilisarnaatip naqinnerinik inuussutissarsiornikkut atuinissaannut inerteqqusersinnaavai, ima pisoqartillugu

- 1) naqinneq nioqqutissap ilisarnaataata assigippagu, kiisalu nioqqutissat imaluunniit kiffartuussutit naqinnermik atuiiffiqeqalersimasut nioqqutissanut imaluunniit kiffartuussutinut nioqqutissap ilisarnaataata illersorneqarfigisai assigippagit, imaluunniit
- 2) naqinnerup nioqqutissap ilisarnaataata assigippagu imaluunniit assinguppat, kiisalu nioqqutissat kiffartuussutillu taakkuuppata assinguppataluunniit, taamaalilluni paarlaassinissamut aarlerinaateqarsinnaalluni, tamakkununga ilaallutik isummerneqarsinnaalluni nioqqutissap ilisarnaataanut attuumassuteqartoq.

Imm. 2. Imm. 1-imi nioqqutissanut kiffartuussutinulluunniit assignissaannut assingunissaannulluunniit qanorluunniit killilersuuteqartoqaraluarpat, nioqqutissamut ilisarnaammik piginnittup nioqqutissanut kiffartuussutinulluunniit atuinissaq inerteqqutiginnaavaa, nioqqutissap ilisarnaataa nunami maani ilisimaneqarluartuuppat, taamallu atuneq nioqqutissap ilisarnaataata immikkuullarissup atorneratigut imaluunniit

tusaamaneqarnera atorneratigut tulluannigitsumik atornerluinermik kinguneqassappat imaluunniit immikkuullarissuuneranik tusamalluarneqarneranilluunniit akornusiissappat.

Imm. 3. Inuussutissarsiornermi atuinermi immikkut eqqarsaatigineqassapput

- 1) naqinneq nioqqutissanut taakkuluunniit poortuutaannut inissinnissaa,
- 2) nioqqutissat tuniniarnissaannut neqeroortitsilluni, pilerisaarutigalugit imaluunniit tamakku siunertaralugit toqqortaralugit imaluunniit naqinneq taanna pineqartoq atorlugu kiffartuussutinik neqerooruteqarluni imaluunniit suliaqarluni,
- 3) naqinneq taanna atorlugu nioqqutissanik eqqussuineq imaluunniit avammut tuniniaaneq, imaluunniit
- 4) naqitap suliffiup pappiaraataanut atorlugu kiisalu pilerisaaruteqarnissaq siunertaralugu.

Piginnittup pisinnaatitaaffiit killilersuutit

§ 5. Nioqqutissap ilisarnaataanik piginnittussaataasup inerteqqutigisinnaanngilaa ileqqorissaarluni pilerisaarisarneq malillugu allat inuussutissarsiornikkut ima atuinissaannut

- 1) nammineq aterisaq aamma nammineq najugaqarfik
- 2) makku pillugit nioqqutissap imaluunniit kiffartuussutip suunera pillugu nalunaarnerit; qanoq issusia, annertussusia, atorneqarfissaa, nalinga, nunap sukutsitaani aallaaveqarnera, nioqqutissap tunisassiarinerani piffissaq imaluunniit kiffartuussutinik isumaginnittarnerit imaluunniit nioqqutissap kiffartuussutilluunniit piginnaasai allat, imaluunniit
- 3) nioqqutissap kiffartuussutilluunniit atorneranut nalunaarnerit pisariaqartippatigut nioqqutissap ilisarnaataa, pingaartumik allanut ilanngullugu atussagaanni imaluunniit kingoraartissatut atussagaanni.

Allanut atuisinnaatitsineq

§ 6. Nioqqutissanut ilisarnaasiisinnaatitaanermik piginnittuusup nioqqutissat piginnittuusumit namminermit imaluunniit taassuma akuersineratigut ilisarnaat pineqartoq ilisarnaatigalugu Europami nunat Niueqatigiit iluanni nioqqutigineqartut pillugit ilisarnaammik atuinissaq inerteqqutigisinnaanngilaa.

Imm. 2. Imm. 1 atortussaatinneqassanngilaq piginnittuusup naammaginatartumik peqqutissaqarluni nioqqutissanik tuniniaanissamut akerliujuannassappat, pingaartumik pineqartut tuniniarneqareernermikkut pissusiat allanngorsimatillugit imaluunniit ajornerulersimatillugit.

Pisinnaatitaaffiit assortuussinnaaffii

§ 7. Inuit marluk arlallilluunniit tamarmik immikkoorlutik ilisarnaasiussamik ataasiusumik imminnulluunniit assingusunik ilisarnaasiisinnaatitaanerminnik piumasaqarpata pisinnaatitaaneq siulliulluni pilersoq salliutinneqassaaq, aalajangersakkani kinguliini allassimasuni allatut aalajangersaasoqarsimangippat. Pisinnaatitaaffik nalunaarsorneqareersimasooq atuuttuulersutut isigineqassaaq ulloq qinnuteqaatip tunniunneqarfigisaa aallarnerfigalugu, tak. § 12, imaluunniit ullormi §§ 18 imaluunniit 19-imi maleruagassat malillugit salliutinneqarnissaq pillugu piumasaqarnermi ulloq aallarnerfigalugu.

§ 8. Nioqqutissap ilisarnaataanut nalunaarsukkamut pisinnaatitaaneq nutaajunerusoq atuussinnaavoq ilisarnaammut taamaalilluni paarlaanneqarsinnaasumut pisinnaatitaanerup pisoqaanerusup saniatigut qinnuteqaat tamanna upperalugu tunniunneqarsimappat aammalu

pisinnaatitaanermik pisoqaanerusumik piginnittuusup pisinnaatitaanermik nutaajunerusumik nunami maani ukiuni tulleriinni 5-ini atuineq nalunngersimappagu akerliuniarfigisimangippagulu.

§ 9. Nioqqutissap ilisarnaataanut nutaajunerusumut pisinnaatitaaneq aamma atuussinnaavoq, ilisarnaammut taamaalilluni paarlaanneqarsinnaasumut pisinnaatitaanerup pisoqaanerusup saniatigut ilisarnaammik pisoqaanerusumik piginnittoq sivitsorpallaartinnagu ilisarnaatip nutaajunerusup atornissaa akornuserniarlugu pisariaqartumik sulissuteqartoqarsimangippat.

§ 10. Pisuni §§ 8 aamma 9-mi eqqartorneqartuni nioqqutissat ilisarnaataannik pisoqaanerusumik atuinissaq nioqqutissat ilisarnaataannik nutaajunerusumik piginnittuusup inertequtigisinnaangilaa, nioqqutissat ilisarnaataannik pisoqaanerusumik piginnittoq ilisarnaammut utaajunerusumut tunngatillugu pisinnaatitaajunnaareeraluarpalluunniit.

Imm. 2. Pisuni § 9-mi eqqartorneqartuni, taamaaliornissaq naapertuussorineqarpat, aalajangerneqarsinnaavoq nioqqutissat ilisarnaataasa arlaat tamaasaluunniit aatsaat atorineqassasut immikkut ittumik iliornikkut, soorlu assersuutigalugu aalajangersimanerusumik ilusiliinikkut imaluunniit sumiissuseq taallugu ilassuteqartitsinikkut.

Oqaatsinik ujarliutini (ordbogini) il.il. nioqqutissat ilisarnaataannik issuaaneq

§ 11. Oqaatsit isumaannik ujarliutini, mappersakkani ujarlerfissani, ilinniutini atuagassiissutiniluunniit assingusuni sulianut tunngasunik imalinnik atuakkiortuusup, naqiterisitsisuusup naqiterisitsisarfiutillillu nioqqutissap ilisarnaataannik nalunaarsukkamik piginnittuusup piumasaqarneratigut isumagissavaa, ilisarnaatip pineqartup nalunaarsukkatut ilisarnaataanera ilanngullugu taanagu issuarneqannginnissaa.

Imm. 2. Kinaluunniit imm. 1 malillugu pisussaaffigisaminik naammassinninngitsoq naapertuuttutut isumaqarfiginartumi aaqqiissutaasussamik nalunaaruteqassaaq.

Kapitali 2

Nioqqutissat ilisarnaataannik nalunaarsuineq

§ 12. Nioqqutissat ilisarnaataannik nalunaarsuinissaq pillugu qinnuteqaat Patent- og Varemærkestyrelsenimut tunniunneqassaaq. Qinnuteqaammut ilanngunneqassapput nioqqutissap ilisarnaataata assilineru nuutsillugu aammalu qinnuteqartup aqqa imaluunniit suliffeqarfia pillugu paasissutissat. Qinnuteqaammi aamma ilanngunneqassapput nioqqutissat sullissinerilluunniit ilisarnaataat nalunaarsortinniarneqartut.

Imm. 2. Qinnuteqaat § 48-mi aalajangersarneqarsimasut malillugit qinnuteqaatit oqaasertalersorneqassaaq. Qinnuteqaammut akiliut aalajangerneqarsimasoq ilanngunneqassaaq.

Imm. 3. Patent- og Varemærkestyrelsen nioqqutissat ilisarnaataannik nalunaarsuinermik isumaginnittuuvuq. Nalunaarsuinerit il.il. Styrelsenip tamanut nalunaarutigisarpai.

Nalunaarsuinissamut aporfusinnaasut

§ 13. Nioqqutissat ilisarnaataat nalunaarsorneqassaguni § 2-mi taaneqartutut peqquseqassaaq, ilanngullugu pisariaqartitatut immikkuullarissutut ilisarnaateqassalluni.

Imm. 2. Nioqqutissat ilisarnaatisaat makku nalunaarsorneqarsinnaanngillat.

- 1) Nioqqutissat ilisarnaataa naqinnerinnarnik imaluunniit taaguusersuinnagaasut, nioqqutissat tuninerini nioqqutissap sullissinerulluunniit suunera, sananeqaataa, amerlassusii, atorneqarfia, nalinga, nunap ilaanit aallaaveqarnera, nioqqutissap qanga suliarineqarnera imaluunniit sullinneqarsimanerup qanoq issusia allalluunniit tamakkunatigut piginnaasassaasut allat eqqarsaatigalugit.
- 2) Nioqqutissat ilisarnaataat naqinnerinnaasut imaluunniit ulluinnarni taaguutinik taamaallaat oqaasertalersukkat, imaluunniit nioqqutissanik tuniniaanermi nalinginnaasumi nioqqutissamut sullissinermulluunniit pisarnertut taaguutigineqartut.

Imm. 3. Nioqqutissat ilisarnaataat imm. 1 aamma 2-mi aalajangersakkat apeqqutaatinnagit nalunaarsorneqarsinnaasaaq qinnuteqaatip tunniunneqalinnginnerani atorneqarnerata kingunerisaanik pisariaqartitanik immikkuullarissumik ilisarnaateqalersimappat.

§ 14. Taamattaasut nalunaarsorneqarnissamut ilaatinneqanngillat:

- 1) Nioqqutissat ilisarnaataat inatsisinut, tamat eqqissisimanerannut imaluunniit arneriniarnermi anguseriniarnermiluunniit ileqqorissaarnissamut akerliusut
- 2) Nioqqutissat ilisarnaataat pututitsiniutissatut piukkunnartut, soorlu nioqqutissap imaluunniit sullissinerup suuneranik, qanoq issusianik imaluunniit nunap immikkoortuanut sumut aallaaveqarnera eqqarsaatigalugit.
- 3) Nioqqutissat ilisarnaataat oqartussanit akisussaasunit akuerineqarsimanngitsut, suliffissuaqarnikkut piginnittussaataaneq pillugu illersuinissamut nunat tamat Parisimi isumaqatigiissutaat 6 c naapertorlugu itigartitsissutigineqartussat, kiisalu ilisarnaatit naqinnernut, aallaavimmik ilisarnaataasut aamma sakkut tamat soqutigisaat, nalunaarsuinerit pisortani oqartussaasunit akuerineqarsimanngippata.
- 4) Nioqqutissat ilisarnaataat akuerineqarnani inuit imaluunniit suliffeqarfiup aqqatut allamut inatsisit naapertorlugit atugasiissutigineqareersutut paasineqarsinnaasut imaluunniit taamaattunik tunngavissinneqaqqaarani ilaqartitat, imaluunniit inuup assingatur, tamatumuunakkullu inuit qangarsuarli toqoreersimasut eqqarsaatigineqanngippata, imaluunniit akuerineqarnani atermik immikkuullarissumik imaqartut imaluunniit allap pigisaata aalaakkaasup assilineqarneranik imaqartut.
- 5) Nioqqutissat ilisarnaataat akuerineqarnani inuup allap atuakkaa imaluunniit eqqumiitsuliaa illersorneqartoq immikkuullarissutut taaguutaanik imaqartutut paasineqarsinnaasunik ilaqartoq imaqartorluunniit, imaluunniit allap piginnittussaataalluni suliaanik taamaattumik imaluunniit assiliissummik assilisaanik piginnittussaaffianik imaluunniit allap pilersitsinermigut piginnittussaataaffianik narrunarsaataasut

§ 15. Ima ittoqartillugu nioqqutissat ilisarnaataat nalunaarsorneqarsinnaanngilaq

- 1) nioqqutissat ilisarnaataa pisoqap assigippagu, nioqqutissallu imaluunniit sullissinerit ilisarnaat atorlugu nalunaarsorneqarusuttut nioqqutissat sullissinerilluunniit ilisarnaatip pisoqqap illersugaasup assigippagit, imaluunniit
- 2) paarlaanneqarsinnaappata, ilaallutik nioqqutissat ilisarnaataanut pisoqaanerumut attuumassuteqarsorinarpata, ilisarnaat nutaajunerusoq ilisarnaatip pisoqaanerup assigippagu imaluunniit tassunga assinguppat, kiisalu nioqqutissat kiffartuussutilluunniit taakkuupata imaluunniit assigippagit.

Imm. 2. Imm. 1 malillugu nioqqutissat ilisarnaataat pisoqaaneruput ima paasisariaqarput

- 1) ilisarnaatit makkuninnga ilaqartut, nioqqutissap ilisarnaataa pillugu qinnuteqarnissamut ullua sioqqullugu qinnuteqarnermi ullulerneqarsimasut,

ilisarnaatinullu tamakkununga ikiorsiiniarluni salliutinneqarnissaq
eqqarsaatigineqarsinnaappat;

- a) EF-mi nioqqutissat ilisarnaataat,
 - b) nioqqutissat ilisarnaataat nunami maani nalunaarsorsimasut, imaluunniit
 - c) nioqqutissat ilisarnaataat nunani tamani nalunaarsorsimasut nunami maani
atuuttussanngorsimasut,
- 2) EF-imi nioqqutissat ilisarnaataat, taakku pillugit EF-imi nioqqutissat ilisarnaataat
pillugit peqqussut naapertorlugu ilisarnaatit nr. 1, naqinnerit b, aamma c-mut
tunngatillugu sivisuumik atorsimanerat eqqarsaatigeqqusaasut, aamma
atorunnaarsimagaluarpata imaluunniit peerneqarsimappata.
 - 3) ilisarnaatinik nr. 1 aamma 2-mi pineqartunik qinnuteqarneq,
nalunaarsorneqarsinnaanerit sillimaffigalugu, imaluunniit
 - 4) nioqqutissat ilisarnaataat piffissami qinnuteqarfiusumi, immaqalu
salliutitaasinnaanermut piffissaliussap nalaani, qinnuteqaammut iluaqusiiniarlugu,
naalagaaffiit Paris-imi isumaqatigiissutaanni artikel 6 b-mi taaneqartutut
isumaqartillugu nunami maani ”ilumut ilisimaneqartoq.

Imm. 3. Imallu pisoqarnerani nioqqutissat ilisarnaataat nalunaarsorneqarsinnaanngilaq

- 1) EF-imi nioqqutissap ilisarnaataata pisoqaanerusup assigippagu tassungaluunniit
assinguppat, tak. imm. 2, nioqqutissallu imaluunniit sullissinerit EF-imi nioqqutissat
ilisarnaataani pisoqaanerusumut naleqqiullugu allaanerusutut nalunaarsorneqarusuttut,
EF-imilu nioqqutissat ilisartaataat Europami naalagaaffiit Niueqatigiit iluanni
ilisimaneqarluarpat, nioqqutissallu ilisarnaataata nutaajunerusup atorneqarnera EF-imi
nioqqutissat ilisarnaataata pisoqaanerusup immikkuullarissusianik imaluunniit
tusaamaneqarneranik tulluanngitsumik atorneqarnissaanik kinguneqassappat,
imaluunniit taama atuinerup ilisarnaatip immikkuullarissuuneranik imaluunniit
tusaamaneqarneranik akornusiisinnaappat,
- 2) nioqqutissap ilisarnaataata ”ilisimaneqarluartup” assigippagu tassungaluunniit
assinguppat, tak. imm. 2, nr. 4, nioqqutissallu imaluunniit sullissinerit nioqqutissat
ilisarnaataani pisoqaanerusumit ilisimaneqarluartumillu allaanerusumik
nalunaarsorniarneqarpat, nioqqutissat ilisarnaataani nutaajunerusumik atuneq
kinguneqarsinnaappat, isumaqartoqarluni ilisarnaatit imminnut attuumassuteqartut,
nioqqutissat ilisarnaataata pisoqaanerusup immikkuullarissusianik imaluunniit
tusaamaneqarneranik tulluanngitsumik atorneqarnissaanik kinguneqassappat,
imaluunniit taama atuinerup ilisarnaatip immikkuullarissuuneranik imaluunniit
tusaamaneqarneranik akornusiisinnaappat, imaluunniit
- 3) nioqqutissat ilisarnaataata assigippagu imaluunniit malunnaangitsumik
allaanerulaaginnarpat, piffissami qinnuteqarfiusumi, imaluunniit qinnuteqaat
pineqartoq iluaquserniarlugu piffissami salliutinneqarfiusumi ilisarnaatip
nutaajunerusup nalunaarsorneqarnissaanut qinnuteqarnermi, nioqqutissanulu
imaluunniit sullissinernut taakkununga assingusunulluunniit nunami allami
atulersimappat sulilu atorneqarluni, qinnuteqartullu qinnuteqarfiusup nalaani nunami
allami ilisarnaat ilisimareersimassappagu imaluunniit ilisimareertussaagaluarpagu.

Imm. 4. Imallu pisoqartillugu nioqqutissat ilisarnaataat nalunaarsorneqarsinnaanngilaq,

- 1) nioqqutissat ilisarnaataata taassuma imm. 2 malillugu Danmarkimi nioqqutissat
ilisarnaat pisoqaanerusoq assigippagu imaluunniit taassumunnga assinguppat,
aammalu nioqqutissanut imaluunniit sullissinernut nioqqutissat ilisarnaataata
pisoqaanerusup nalunaarsorneqarfisaniit allaanerusunut tunngatillugu
nalunaarsortinniarneqarpat, nioqqutissat ilisarnaataata pisoqaanerusoq taamaattoq
nunami maani ilisimaneqarluartillugu aammalu nioqqutissat ilisarnaataani
nutaanerusumik atuinerup nassatarisinnaappagu nioqqutissat ilisarnaataata

pisoqaanerusup immikkuullarissusianik imaluunniit tusaamaneqarluarneranik tulluanngitsumik atuneq imaluunniit taamatut atunerup immikkuullarissusia imaluunniit tusaamaneqarnera akornuserneqarsinnaassappat, imaluunniit

- 2) nunami maani atuinikkut nioqqutissat ilisarnaataa pineqartup assigisaanut imaluunniit taassumunnga paarlaanneqarsinnaasumut inuussutissarsiutitut ingerlassamut allamut atorneqartumut atuisinnaatitaaneq pissarsiarineqarsimappat nioqqutissap ilisarnaataanik nutaajunerusumik atuinissap qinnuteqaataanera sioqqullugu imaluunniit nioqqutissap ilisarnaataanik nutaajunerusumik atuinissap qinnuteqaataanissaanut iluaqutaasussatut salliutitaanissamut piffissaatitaasusaaq sioqqullugu, pisoqaanermik piginnittussaataasup ilisarnaammik nutaajunerusumik atuinissaq inerteqqutigisinnaavaa.

Imm. 5. Nioqqutissat ilisarnaataat imm. 1-4-mi maleruagassat malillugit nalunaarsorneqarnissamut itigartitsissutaassanngilaq, nioqqutissap ilisarnaataanik pisoqaanerusumik allanik piginnittuusup imaluunniit pisoqaanerusunik allanik piginnittussaataasup nioqqutissat ilisarnaatip nutaajunerusup nalunaarsorneqarnissaanut isumaqataalluni akuersaarpat.

Ilanngussinngittarnerit

§ 16. Nioqqutissat ilisarnaataanik piginnittussaataaneq nalunaarsorneqarnikkut anguneqarsimasooq, nioqqutissat ilisarnaataasa immikkuualuttortai immikkoortillugit nalunaarsorneqarsinnaanngitsut ilaanngillat.

Imm. 2. Nioqqutissat ilisarnaataat taamaattunik immikkuualuttortaqarpat ilisarnaatillu nalunaarsugaanerata nioqqutinik ilisarnaasiisinnaatitaanerup annertussusiata tungaatigut qularutigineqalersinnaanera ilimagissallugu pissutissaqarluinnarpat, taava immikkuualuttut tamakkua illersuusigaanerat erseqqissumik ilanngutinngitsoorneqarsinnaavoq.

Imm. 3. Kingusinnerusukkut paasineqarpat ilisarnaatip immikkuualuttortai illersuusigaanermut ilanngutinngitsuukkat nalunaarsorneqarsinnaalersimasut, immikkuualuttortat tamakku ilisarnaalluunniit nammineq nutaamik nalunaarsorneqarsinnaappat imm. 2-mi oqaatigineqartutut killilerneqartanngitsumik.

Nioqqutissat immikkoortui

§ 17. Nioqqutissat ilisarnaataat nioqqutissanut imaluunniit sullissinernut immikkoortunut ataatsimut arlalinnuunniit nalunaarsorneqarsinnaapput. Immikkoortut aggorneri økonomi-og erhvervsministerip aalajangersagaliortarpai.

Isumaqatigiissutinik tulleriissaarineq

§ 18. Nioqqutissat ilisarnaataata nalunaarsorneqarnissaanik qinnuteqaatip siulliup nunami suliffissuaqarnermut tunngasutigut piginnittussaataaneq illersorniarlugu Parisimi isumaqatigiissummut peqataasuni, imaluunniit nunarsuarmi niueqatigiinnermi kattuffimmut (WTO) ilaasortaalluni, tunniunneqareerneranik kingusinnerpaamik qaammatit 6-it qaangiunnerisigut nalunaarsuinissaaq pillugu qinnuteqaat nunami maani tunniunneqassappat, qinnuteqaat taanna piumasaqartoqarneratigut ulloq siullermik tunniussiviusooq naatsorsuutigalugu nalunaarsugassanngortinnissaanut salliutinneqassaaq. Taama salliutitsinerup nassataraa, qinnuteqaat kingusinnerusukkut pisut tungaasigut, soorlu allat

qinnuteqaataat imaluunniit allat ilisarnaammik atuineri, nunami allami qinnuteqaatip tunniunneqarneranut ilutigitillugu tunniunneqarsimasutut isigineqassaaq.

Imm. 2. Imm. 1 atuutissaaq, nioqqtissanik ilisarnaatit nunami Parisimi isumaqatigiisummut peqataanngitsumi, imaluunniit WTO-mut ilaasortaasumi, siullermeersumik nalunaarsorneqartussatut qinnuteqaataasut pillugit taamatulli atueqatigiinneqassappat.

Saqqummersitsinernik tulleriissaarineq

§ 19. Nioqqtissat ilisarnaataata nioqqtissanik pisortatigoortumik imaluunniit pisortanit akuerineqartumik nunat tamat saqqummersitsinerni siullermeersumik atorineqareerneraniit kingusinnerpaamik qaammatit 6-it qaangiunnerisigut nioqqtissat ilisarnaataanik nalunaarsuinissaaq pillugu qinnuteqaat nunami maani tunniunneqassappat, qinnuteqaat ullormit saqqummersitsinermi atorineqarfigisaaniit salliutinneqarnissaanik pisutut naatsorsuutigineqassaaq. Taama salliutitsinerup kingunerissavaa, qinnuteqaat kingusinnerusukkut pisut tungaasigut, soorlu allat qinnuteqaataat imaluunniit allat ilisarnaammik atuineri, nunami allami qinnuteqaatip tunniunneqarneranut ilutigitillugu tunniunneqarsimasutut isigineqassaaq. Saqqummersitsinerit taaneqartut tassaapput saqqummersitsinerit nunarsuaq tamakkerlugu saqqummersitsisarnernit pillugit Isumaqatigiisummi 22. november 1928-meersumi, kingorna nutarterit ilanngullugit, nassuiarneqartut.

Qinnuteqaatinik suliarinnittarneq

§ 20. Qinnuteqaat inatsimmut imaluunniit inatsit malillugu aalajangersakkat tunngavigalugit naapertuutinnigippat imaluunniit Patent- og Varemærkestyrelsen isumaqarpat qinnuteqaatip akuersaarnissaanut allanik akornutissaqartoq, qinnuteqartoq styrelsenimit tamatuminnga nalunaarfigineqassaaq, aammalu qinnuteqartup oqaaseqaateqarnissaanut piffissaliineqassalluni.

Imm. 2. Piffissaliussap naanerani qinnuteqaat styrelsenip isummerfigissavaa, qinnuteqartup oqaaseqaateqarnissaanut nutaamik piffissaliisoqarsimannigippat.

Nioqqtissat ilisarnaataanut piginnittussaanageranut isummernerit

§ 21. Nioqqtissat ilisarnaataanik qinnutigineqartumik imaluunniit nalunaarsoriikkamik piginnittussatut arlaat isummerpat, apeqqut nalornisoornartoqarsorinarpat Patent- og Varemærkestyrelsenip pineqartoq piffissap erseqqinerumik killilikkap ingerlanerani eqqartuussivikkoortumik suliassannngortitseqqullugu kaammattorsinnaavaa. Kaammattuineq malinneqannigippat taama isummersimanerup taamaatinneqarneratut isigineqassaaq. Tamanna pillugu kalleriutiginninneq kaammattuineri tunniunneqassaaq.

Imm. 2. Nioqqtissat ilisarnaataanik piginnittussaaitaneq eqqartuussivikkoortumik suliassannngortinneqarsimappat, suliassap suliarineqarnissaa eqqartuussivimmi aalajangiiffigivinneqarnissaata tungaanut Patent- og Varemærkestyrelsenip suliassaq unitsikkallassavaa.

Nalunaarsuineq

§ 22. Qinnuteqaat akuerineqareerpat nioqutissat ilisarnaataat nalunaarsorneqassaaq, nalunaarsuisimanerlu tamanut saqqummiunneqassalluni.

Akerliliissuteqarneq

§ 23. Nalunaarsuineq tamanut saqqummiunneqareerpat, nalunaarsuinerup atorsinnaassusia akerlilerlugu saqqummiussisoqarsinnaalissaaq. Akerliliineq tunngavilersorneqartussaq, tamanut saqqummiussinerata ulluanit qaammatit 2-t qaangiutsinnagit Patent- og Varemærkestyrelsenimut saqqummiunneqassaaq. Akerliliissummut akiliut ilanngunneqassaaq, taassuma akia aningaasarsiornermut inuusutissarsiornermullu ministerimit aalajangerneqartussaq.

Stk. 2. Akerliliissut saqqummiunneqarpat, nalunaarsuineq pillugu § 20 malillugu styrelsenip nutaamik isummerfigissallugu sammeqqissavaa. Samminnerup nalaani § 28, imm. 5-imi malittarisassat aamma atuutissapput. Piginnittussatut nalunaarsuinerмик piginnittoq akerliliissut pillugu kalerrinneqassaaq, oqaaseqaateqarnissaminullu periarfissinneqassalluni.

Imm. 3. Nalunaarsuineq aalajangiusimaneqaannarpat, akerliliissummik tunniussisoq piginnittussaatsinermillu piginnittoq tamanna pillugu nalunaarfigineqassapput.

Imm. 4. Nalunaarsuineq tamakkiisumik ilaannakortumilluunniit atorunnaarsinneqarpat, tamanna pillugu aalajangiisussamik aalajangiineqareerpat tamanut nalunaarutigineqassaaq.

Ilisarnaammik allanngortitsineq

§ 24. Piginnittuusumit piunasaqarneq mallillugu nioqutissat ilisarnaataat nalunaarsorneqarsimasooq malunnarpallaanngitsumik allanngortinneqarsinnaavoq, nioqutissat ilisarnaataata tamakkiisumik isikkua allannginnermit sunnerneqassanngippat.

Imm. 2. Nioqutissat ilisarnaataat nalunaarsorneqareersimasut allanngortinneqarneri nalunaarsuinermut ilanngunneqassapput tamanullu nalunaarutigineqassallutik.

Imm. 3. Taamattaq piginnittuusup piunasaqarneratigut nioqutissat ilisarnaataat qinnutigineqarsimasooq malunnarpallaanngitsumik allanngortinneqarsinnaavoq.

Atuisussaatitaaneq

§ 25. Nioqutissat ilisarnaataanik nalunaarsoriikkamik piginnittuusooq nalunaarsuinerup naammassereerneranit ukiut 5-it qaangiutsinnagit nioqutissat ilisarnaataanik nioqutinut sullissinernullu, nalunaarsuinerמי tunngaviusunut, tunngatillugu nunami maani atuisimanngippat, imaluunniit ukiuni 5-imi atuneqarsimanngivissorpat nalunaarsuineq atorunnaarsinneqarsinnaavoq, tak. § 28, atuisoqarsimannginnera naammaginartumik tunngavilersorneqarsimanngippat.

Imm. 2. Makku imm. 1 naapertorlugu atuinertut aamma naatsorsuunneqassapput:

- 1) Nioqutissat ilisarnaataata nalunaarsorneqarfigisaanit allaassuteqangaanngitsutut ittuni atuneq.
- 2) Nioqutissat nunami maani ilisarnaataannik nioqutissanut taakkualuunniit poortuutaanut ikkussuineq nunanut allanut tuniniaanissaq kisiat siunertaralugu.

Imm. 3. Nioqqutissat ilisarnaataanik atuineq, piginnittuusup isumaqataalluni akuersineratigut pisoq, piginnittuusup nioqqutissat ilisarnaataanik atuineratut nallersuunneqassaaq.

Nalunaarsuinerup atuuffiata sivilissusia

§ 26. Nioqqutissat ilisarnaataanik nalunaarsuinikkut piginnittussaanertut anguneqartoq, § 12 naapertorlugu qinnuteqaatip ullormit tunniunneqarfianit atuutissaaq, ullorlu nalunaarsorneqarfiusoq aallarnerfigalugu ukiuni 10-ni atuutissalluni.

Imm. 2. Nalunaarsuineq ukiunut 10-kaartunut nutarteneqarsinnaavoq, piffissap nalunaarsorneqarfiusup pineqartup naanera aallarnerfigalugu.

Nutarterineq

§ 27. Nutarterinissaq pillugu qinnuteqaateqartoqassaaq akiliutissap aalajangerneqarsimasup Patent- og Varemærkestyrelsenimut akilerneratigut, tamannalu pissaaq piffissap nalunaarsorneqarfiusup naanissaa sivikinnerpaamik qaammatit 6-it sioqqullugit naaneraniillu kingusinnerpaamik qaammatit 6-it qaangiunnerisigut.

Imm. 2. Qinnuteqaat pissusissamisoorpat, nutarterineq nalunaarsuiffimmut allanneqassaaq.

Imm. 3. Nutarterinermut Patent- og Varemærkestyrelsen ilisarnaammik piginnittoq taassumaluunniit pisinnaatitaa akiliisissavaa, akiliisitsiniangitsoorerulli malitsigisaanik piginnaatitsissutinik annaasaqarnernut akisussaataitaasanani.

Imm. 4. Qinnuteqaat maleruaqqusanut naapertuutinngippat Patent- og Varemærkestyrelsenip tamanna pillugu nalunaarutiginnissaaq, qinnuteqartorlu oqaaseqaateqarnissaanut piffissaliussamik aalajangiilluni.

Imm. 5. Piffissaliussap naanerani styrelsenip tinnuteqaat isummerfigissavaa, qinnuteqartoq oqaaseqaateqarnissaanik nutaamik piffissaleqqinneqarsimanngippat.

Kapitali 3

Nalunaarsuinerup atorunnaarsinneqartarnera

§ 28. Nioqqutissat ilisarnaataat inatsimmi matumani aalajangersakkanut naapertuutinngitsumik nalunaarsorneqarsimappat, nalunaarsuineq atorunnaarsinneqarsinnaavoq, takukkilli §§ 8 aamma 9. Nalunaarsuinissamut akornutaasoq immikkuullarissummik assigisaannilluunniit amigaateqarpat, tak. § 13, naliliinermi nalunaarsuinerup kingorna atuineq aamma eqqarsaatigineqassaaq, tak. § 13, imm.3

Imm. 2. Ima pisoqartillugu nalunaarsuineq taamattaq atorunnaarsinneqarsinnaavoq

- 1) nioqqutissat ilisarnaataat § 25-mi aalajangersakkat malillugit atorneqanngippat,
- 2) nioqqutissat ilisarnaartaat piginnittuusup ingerlatsinerata imaluunniit ilatsiinnarnerata nassatarisaanik tassaalersimappat nioqqutissamut sullissinermulluunniit nioqqutissat ilisarnaataata nalunaarsorneqarfigisaanut tunngatillugu nalinginnaasumik taaguutigisaq, imaluunniit
- 3) nioqqutissat ilisarnaataanik atuineq, piginnittuusup nioqqutissanut sullissinernulluunniit nioqqutissat ilisarnaataata nalunaarsorneqarfigisaanut tunngatillugu atuinerata imaluunniit taassuma isumaqataaneratigut atuinerusup nassatarisaanik pututitsissutaasinnaasorinarpat, pingaartumik nioqqutissat

imaluunniit sullissinerit suunerat, sananeqaataat imaluunniit nunap ilaanit aallaaveqarnerat eqqarsaatigalugu.

Imm. 3. Nioqqutissat ilisarnaataanik imm. 2. nr. 1 malillugu atorunnaarsitsinissamik piunasaqaat atortuulersinneqarsinnaangilaq nioqqutissat ilisarnaataanik atuivinneq piffissami ukiut 5-ikkaartuni sivissuseqartitaasup naanerata aammalu atorunnaarsitsinissamik qinnuteqaammut tunniussiviusup akornanni aallarneqarsimappat imaluunniit nangeqqinneqarsimappat. Taamaakkaluartoq atorunnaarsitsinissamik qinnuteqaammik tunniussinerup siornatigut qaammatit kingullit 3-t ingerlaneranni atuilerneq imaluunniit atueqqilerneq naatsorsuutigineqassanngilaq, atuilernissamut imaluunniit atueqqilernissamut piareersarnerit aatsaat aallarneqarsimappata piginnittuusup atorunnaarsitsinissamik qinnuteqaatip tunniunneqarsinnaaneraniq ilisimannilereerneratigut.

Imm. 4. Atorunnaarsitsinissamut peqquutigisaq nioqqutissat imaluunniit sullissinerit ilisarnaatip nalunaarsorneqarfigisaasa ilaannaannut tunngasuuppat pineqartumut tunngasut kisiisa pillugit nalunaarsuineq taamaallaat atorunnaarsinneqassaaq.

Imm. 5. Ilisarnaat pisoqaq aporaaffiusoq atorunnaarsitsinissamut peqquutaappat, atorunnaarsitsinissamut piunasaqaat taamaallaat atortinneqarsinnaavoq, inuup nalunaarsuineramik atorunnaarsitsinissamut piunasaqarsimasup allap piunasaqarneratigut uppersarsinnaaguniuk, ilisarnaat pisoqaasoq § 25-mi malittarisassat malillugit atorneqarsimasoq. Nioqqutissat ilisarnaataat pisoqaq taamaallaat nioqqutissat imaluunniit sullissinerit nalunaarsorsimasut ilaannaannut atorneqarsimappat, nioqqutissat imaluunniit sullissinerit tamakku ilaannaannut nalunaarsorsimasutut isigineqassaaq. Illuatungeriit tamarmik qaqugukkulluunniit suliami apeqqutit pillugit illuatungerisani eqqartuussivimmuut suliaakkiissutigisinnaavaa, suliami Patent- og Varemærkestyrelsen aalajangiisimappat aalajangiisimangikkaluarpalluunniit.

Eqqartuussutsikkut atorunnaarsitsineq

§ 29. Nalunaarsukkamik § 28 naapertorlugu atorunnaarsitsineq eqqartuussutikkut pisassaaq, takuulli § 30. Piginnittuusooq eqqartuussivikkoortumik suliaassiissutigineqartassaaq, kinaluunniillu inatsisit tunngavigalugit tamatumunnga soqutiginnittoq eqqartuussivikkoortumik suliaassanngortitsiniarsinnaavoq. Taamattaq Patent- og Varemærkestyrelsen § 13-imi aamma § 14-imi, nr. 1-3-mi aalajangersakkat malillugit eqqartuussivikkoortumik suliaassanngortitsisinnaavoq.

Allaffissornikkut atorunnaarsitsineq

§ 30. Nalunaarsueriaatsip naaneernerani kinaluunniit Patent- og Varemærkestyrelsen-imut piunasaqarsinnaavoq nioqqutissat ilisarnaataanik nalunaarsuineq atorunnaassasoq, atorunnaarsitsinissamut § 28-mi piunasaqaatit eqquutsinneqarpata. Piunasaqarnermut akiliut aningaasarsiornermut inuussutissarsiornermullu ministerimit aalajangerneqarsimasooq ilanngullugu nassiunneqassaaq.

Imm. 2. Nioqqutissat ilisarnaataanik nalunaarsuineq pillugu eqqartuussivimmi suliaq aalajangiisussamik aalajangerneqarasimangippat, nalunaarsuineq taanna pillugu imm. 1 malillugu piunasaqaammik saqqummiisoqarsinnaangilaq.

Imm. 3. Nalunaarsuineq pillugu imm. 1 malillugu piunasaqarneq aalajangiisussamik aalajangiisooqarnissaa sioqqullugu nioqqutissat ilisarnaataat nalunaarsorneqartoq pillugu eqqartuussivikkut suliaassiisoqartillugu, piunasaqaatip sammineqarnissaa Patent- og Varemærkestyrelsen-ip unitsikkallassavaa suliaassap inaarutaasumik

aalajangiiffigineqarnissaata tungaanut, piumasaqarneq nioqutissat ilisarnaataanik nalunaarsukkamik piginnittup saqqummiussimangippagu.

Imm. 4. Piumasaqarneq pillugu nalunaarsukkamik piginnittussaataaasooq nalunaarfigineqassaaq, oqaaseqaateqarnissaminillu periarfissinneqarluni.

Imm. 5. Nalunaarsuineq tamakkiisumik ilaannakortumilluunniit atorunnaarsinneqarpat, tamanna pillugu inaarutaasumik aalajangiineq tamanut nalunaarutigineqassaaq.

Imm. 6. Patent- og Varemærkestyrelsenip aalajangigaa § 46 naapertorlugu Patentankenævnetimut eqqartuussivinnullu ingerlatseqqinneqarsinnaavoq. Illuatungeriit tamarmik qaqugukkulluunniit suliami apeqqutit pillugit illuatungerisani eqqartuussivimmut suliaakkiissutigisinnaavaa, suliami Patent- og Varemærkestyrelsen aalajangiisimappat aalajangiisimangikkaluarpalluunniit.

§ 31. Nioqutissat ilisarnaataanik piginnittoqarnera peqqutissaqartumik nalornisoorutaappat, imaluunniit tassuma najugarisaa ilisimaneqanngippat, kinaluunniit inatsisunik tunngaveqarluni taamaaliornissamut soqutiginnittoq qinnuteqarsinnaavoq nioqutissat ilisarnaataata nalunaarsuiffimmit piiarneqarnissaa pillugu.

Imm. 2. Piiaanissaq pilersinnagu Patent- og Varemærkestyrelsen piginnittuusup piffissaq aalajangigaaq qaangiutsinnagu ilisaritinnissaanik piumasaqassaaq. Piffissaliussaq pillugu nalunaarutiginninneq allakkat tammarnaveeqqusikkat aqqutigalugit allatulluunniit isumannaatsumik iliornikkut nalunaarutigineqassaaq. Piginnittuusup najugaa ilisimaneqanngippat piffissaliussaq tamanut ammasumik nalunaarutikkut nalunaarutigineqassaaq. Piginnittuusooq tamatuma kingorna tutsiutinngippat nioqutissat ilisarnaataat nalunaarsuiffimmit piiarneqassaaq.

Atorunnaarsitsisinnaaneq

§ 32. Nioqutissat ilisarnaataat nalunaarsugaq, nioqutissat ilisarnaataanik nalunaarsukkamik nutarterineq imaluunniit nalunaarsuiffimmi allannguuteqartitsinerup eqqaamasassaralugu allanneqarnera qularutissaangitsumik kukkunikkut piliaasimappat Patent- og Varemærkestyrelsenip nalunaarsuinerup ulluaniit imaluunniit eqqaamasassatut allattuinerup ulluaniit qaammatit 3-t qaangiutsinnagit nalunaarsuineq, nutarterineq imaluunniit eqqaamasassatut allattuineq atorunnaarsissinnaavaa

Piiaaneq

§ 33. Ima pisoqarneratigut piiaaneq pissaaq,

- 1) nalunaarsuineq nutarterneqarsimangippat,
- 2) ilisarnaammik piginnittuusup nioqutissat ilisarnaataata piiarneqarnissaa piumasarippagu,
- 3) nalunaarsuineq § 23 malillugu atorsinnaanngitsutut uppersararlugu nalunaarutigineqarpat, imaluunniit
- 4) piiaasoqarnissaa §§ 29, 30 imaluunniit 31 malillugit aalajangiiffigineqarpat imaluunniit eqqartuussutikkut aalajangerneqarsimappat.

§ 34. Eqqartuussutit suulluunniit, nioqutissat ilisarnaataanik nalunaarsuinerup imaluunniit nioqutissat ilisarnaataanik qinnuteqarnermut tunngasuusut, assilineqarnerat eqqartuussiviup pineqartup Patent- og Varemærkestyrelsenimut nassitutissavaa.

Kapitali 4

Nunat allamiut nioqqutissanut ilisarnaataasa nalunaarsugaanissaannut immikkut aalajangersakkat

Angerlarsimaffittut nunagisami nalunaarsuineq

§ 35. Qinnuteqartoq, nunami maani suliffeqarfimmik ingerlatsisuunngitsoq, aammalu naalagaaffimmi suliffissuaqarnikkut piginnittussaatitaanerit illersorneqarnissaannut naalagaaffiit Parisimi isumaqatigiissutaanni peqataasumi imaluunniit nunarsuarmi niueqatigiit kattuffiannut (WTO) ilaasortaasumi najugaqanngitsoq, pappiaqqatigut uppersarsaassaaq ilisarnaatip pineqartutut ittup angerlarsimaffittut nunagisami nioqqutissanut imaluunniit sullissinernut qinnuteqaammi pineqartutut ittunut tunngatillugu nalunaarsugaanera pillugu.

Imm. 2. Aningaasarsiornermut inuussutissarsiornermullu ministerip isumalluuteqatigiinnissaq tunngavigalugu aalajangersinnaavaa imm. 1-ip atortuutinneqannginnissaa.

§ 36. Aningaasarsiornermut inuussutissarsiornermullu ministerip isumalluuteqatigiinnissaq tunngavigalugu aalajangersinnaavaa nioqqutissat ilisarnaataat, nunami maani nalunaarsorneqarsimannikkaluartut kisiannili naalagaaffimmi allami nalunaarsoriikkat, maani nalunaarsorneqarsinnaanissaat, naalagaaffimmi allami nalunaarsorneqarnermisulli. Taama nalunaarsuineq naalagaaffimmi allami pisumit annertunerusumik atortuutinneqassanngilaq.

Pisinnaatitaatitsinerit

§ 37. Patent- og Varemærkestyrelsenip nioqqutissat ilisarnaataanik piginnittoq kaammattorsinnaavaa inummik Det Europæiske Økonomiske Samarbejdsområdet (Europami aningaasarsiornikkut suleqatigiiffiit) (EØS) imaluunniit Kalaallit Nunaanni najugaqartumik pisinnaatitassaminik toqqaqqullugu, taanna nammineq sinnerluni piginnittumut avaqqunneqarsinnaanngitsumik sunnuteqartuni nioqqutissat ilisarnaataat pillugit suliakiissutinik tiguisinnaasumik kiisalu nalunaartit takkussuuttut tamaasa pillugit suliarinnissinnaasumik. Pisinnaatinneqartup aqqa najugaalu nioqqutissat ilisarnaataanik nalunaarsuiffimmut allanneqassapput.

Kapitali 5

Tunniussineq atuinissamullu akuersissutit il.il.

§ 38. Nioqqutissat ilisarnaataanik piginnittussaatitaaneq tunniunneqarsinnaavoq, ingerlassamut ilisarnaatip atornerqarfianut atatillugu atatinngaluunniit.

Imm. 2. Ingerlassamik allanut tunniussisoqarpat ingerlassap nioqqutissanut ilisarnaataanik piginnittussaaneq ingerlassamik pissarsisumut nuunneqassaaq, allatut isumaqatigiissuteqartoqarsimanngippat.

§ 39. Nioqqutissat ilisarnaataanik nalunaarsukkamik atuisinnaatitaanermik allamut tunniussineq qinnuteqartoqarneratigut nioqqutissat ilisarnaataanut nalunaarsuiffimmi allanneqassaaq.

Imm. 2. Tunniussinerup Patent- og Varemærkestyrelsenimut nalunaarutigineqareernissaa tikillugu nioqqutissat ilisarnaataanik piginnittuusutut naatsorsuunneqassaaq kingullermik nalunaarsuiffimmi allanneqarsimasoq.

Akuersissut

§ 40. Nioqqutissanut sullissinernulluunniit ilisarnaatip nalunaarsorneqarfigisaanut tamanut taakkuluunniit ilaannut tunngatitatut aammalu nunamut tamarmut taassumaluunniit ilaanut tunngatitat nioqqutissat ilisarnaataannut akuersissummik (licens) tunniussisoqarsinnaavoq. Akuersissut taamaattoq immikkut ittuusinnaavoq imaluunniit nalinginnaasuusinnaalluni.

Imm. 2. Akuersissut piginnittuusup imaluunniit akuersissummik tunineqartup qinnuteqarneratigut nioqqutissat ilisarnaataannut nalunaarsuiffimmut allanneqassaaq. Taamattaq nalunaarsuiffimmi allanneqassaaq kingusinnerusukkut uppersarneqarpat akuersissutip atorunnaarnerani.

Imm. 3. Nioqqutissat ilisarnaataanik piginnittuusup piginnaatitaaffiit nioqqutissat ilisarnaataannut tunngasut akuersissummik tunineqartumut akuerissut pillugu isumaqatigiissummi aalajangersakkanik, piffissaq akuersissummumut atuuffissaatitaasoq, nioqqutissat ilisarnaataata nalunaarsuineq naapertorlugu atorneqarfissaatut ilusilersugaanera, nioqqutissat sullissinerilluunniit akuersissummik pissarsinnermut tunngaviusut suunerat, nioqqutissat ilisarnaataannik atuiffissaatitaasoq, imaluunniit nioqqutissat sullissinertulluunniit naammassisat akuersissummik pisup suliaasa pitsaassusiat eqqarsaatigalugit unioqqutitsisumut atuuttussanngortissinnaavai.

Qularnaveeqqusiineq aamma arsaarinninneq

§ 41. Nioqqutissat ilisarnaataanik nalunaarsukkamik piginnittussaaneq qularnaveeqqusiunneqarpat imaluunniit arsaarinnissutigineqarpat, Patent- og Varemærkestyrelsenip tamanna piginnittuusup, qularnaveeqqusiinermik pigisallip imaluunniit suliaqarsuissup piumasaqarneratigut nioqqutissat ilisarnaataannut nalunaarsuiffimmut allassavaa.

Kapitali 6

Inatsisitigut illersugaanissamik aalajangersakkat

§ 42. Nioqqutissat ilisarnaataanik piginnittussaataaeramik piaaraluni imaluunniit mianersuaalliorujussuarnikkut nikanarsaasoq akiliisitaanikkut pineqaatissinneqassaaq.

Imm. 2. Unioqqutitsineq piaarinikkut pisimappat kiisalu sakkortunermik pisimappat, Kalaallit Nunaanni pinerluttulerineq pillugu inatsit malillugu pineqaatissiineqarsinnaavoq. Sakkortunermik pisimasoqarneq pingaartumik isiginiarneqarpoq, inatsisit unioqqutillugit annertuumik malunnartumillu iluanaarniarneq siunertaralugu unioqqutitsineq pisimappat.

Imm. 3. Kalaallit Nunaanni pinerluttulerineq pillugu inatsimmi kapitali 5-imi malittarisassat malillugit selskabit il.il. (inuit inatsisitigut suliallit) pinerluttulerinnermi inatsisitigut akisussaaffilerneqarsinnaapput.

Imm. 4. Unioqqutitsinerit, imm. 1-imi pineqartut, pinerluffigineqarsimasumit nalunaarutigineqassapput. Unioqqutitsinerit, imm. 2-mi pineqartut, taamaallaat pinerluffigineqarsimasumit nalunaarutigineqarsinnaapput, tamat eqqarsaatigineqarnissaat nalunaarutiginninnermi pisariaqartitsinngippata.

§ 43. Kinaluunniit piaaraluni imaluunniit mianersuaalliornikkut allap nioqqutissat ilisarnaataataanik nikanarsaasoq, ima akiliisinneqassaaq

- 1) atuisimanermi pinerluffigineqarsimasumut naammaginartunik akiliineq, aamma
- 2) ajoqusiinerit unioqquitsinerup kingunerisimasai pinerluffigineqarsimasumut taarsiineq.

Imm. 2. Imm. 1, nr. 2 malillugu taarsiiffiginninnerit amerlassusissaannik aalajangiinnermi ilaatigut eqqarsaatigineqassapput pinerluffigineqarsimasup iluanaarutissaminik annaasaqarnera aamma nikanarsaasup pisussaananik iluanaarutigisimasai.

Imm. 3. Suliat imm. 1-imut ilaasut saniatigut pinerluffigineqarsimasup aningaasartaqanngitsumik ajoquserneqarneranut akiliutissat aalajangerneqarsinnaapput.

Imm. 4. Nioqquutissat ilisarnaataannik piginnittussaataaneq nalunaarsuinikkut pilersitaappat aamma imm. 1-imi maleruagassat piffissamut qinnuteqaammik tunniussiviusup ilisarnaatillu nalunaarsorneqarfiata akornanniittumut tunngatillugu atortuutinneqassapput, nikanarsaasup qinnuteqaammik tunniussisoqareersimanera ilisimappagu imaluunniit ilisimasariaqarsimappagu.

§ 43 a. EF-imi nioqquutissat ilisarnaataat pillugit aaqqiissummi artikel 91 naapertorlugu Sø- og Handelsretten tassaavoq EF-imi nioqquutissat ilisarnaataat pillugu eqqartuussiviusoq qullersaasoq, kiisalu Højesteret tassaalluni EF-imi nioqquutissat ilisarnaataat pillugu eqqartuussiviusoq qullersap aappaat.

§ 43 b. EF-imi nioqquutissat ilisarnaataat pillugit aaqqiissummi artikel 91, imm. 1 naapertorlugu inerteqqusiinerit akiliisitsiniarnermik eqqartuussivikkut aalajangerneqassapput.

Imm. 2. Eqqartuussinermi inatsisip kapitaliata 57-imi malittarisassat taama assinganik atuutissapput.

§ 43 c. Inerteqqusiinerit, naalagaaffiit ilaasortaasut iluanni tamani atuutsinneqalersussat, tak, EF-imi nioqquutissat ilisarnaataat pillugit aaqqiissummi artikel 99, imm. 2, Sø- og Handelsrettenimit aalajangerneqassapput.

Imm. 2. Imm. 1 malillugu Sø- og Handelsrettenip aalajangigai Østre Landsretimut ingerlateqqinneqarsinnaapput.

Imm. 3. Eqqartuussinermi inatsisip kapitaliata 57-iani aalajangersakkat assinganik aamma atuutissapput. Suliassat eqqartuussinermi inatsimmi § 645 taaneqartut isumaginissaannut ikiuunnissaq pillugu Sø- og Handelsrettenip piumasaqarneratigut akiliisitsiniarnermi eqqartuussivik ikiutissaq.

§ 43 d. Inerteqqusiineq, nunami immi nioqquutissat ilisarnaataannut aamma EF-imi nioqquutissat ilisarnaataannut attuumassuteqartut, Sø- og Handelsrettenimit aalajangerneqassapput, inerteqqusiineq EF-imi nioqquutissat ilisarnaataannut tunngasut naalagaaffiit ilaasortaasut iluanni tamani atuuttussaappat, tak. EF-imi nioqquutissat ilisarnaataat pillugit aaqqiissummi artikel 99. imm. 2.

Imm. 2. Imm. 1 malillugu Sø- og Handelsrettenip aalajangigai Østre Landsretimut ingerlateqqinneqarsinnaapput.

Imm. 3. Eqqartuussinermi inatsisip kapitaliata 57-iani aalajangersakkat assinganik aamma atuutissapput. Suliassat eqqartuussinermi inatsimmi § 645 taaneqartut isumaginissaannut ikiuunnissaq pillugu Sø- og Handelsrettenip piumasaqarneratigut akiliisitsiniarnermi eqqartuussivik ikiutissaq.

§ 44. Nioqquutissat ilisarnaataannik piginnittussaataaneq annertunerusumik nikanarsarneqarnissaa pitsaaliorniarlugu eqqartuussinikkut isummersimanerit malillugit eqqartuussiviki ilaatigut aalajangersinnaavoq, nioqquutissq nioqquutissat ilisarnaataannik piginnittussaataanermik nikanarsaasoq ima pineqassasoq

- 1) niuerutigineqarneranit utertinneqassasoq,
- 2) niuerutigineqarneranit peerneqavissasoq,
- 3) piuneerutsinneqassasoq,
- 4) pinerluffigineqarsimasumut tunniunneqassasoq imaluunniit
- 5) nioqputissat ilisarnaataat unioqputitsinikkut ikkussuunneqarsimasut peerneqassasut.

Imm. 2. Imm. 1 taamattaq atortunut, sakkunut assigisaannulluunniit nioqputissanik nikanarsaataasunik unioqputitsinikkut suliarineqarsimallutik atorneqarnerusunut assinganik atuutissaaq.

Imm. 3. Imm. 1 malillugu pineqaatissiinerit piviusunngortinneqassapput nikanarsaasumut taarsiiffiginertaqanngitsumik, tamannalu pinerluffigineqarsimasumut taarsiissuteqarsinnaanermut attuumassuteqarnani. Pineqaatissiinerit nikanarsaasup akiligassaanik piviusunngortinneqassapput, tunngavissat immikkut ittut tamatumunnga akerliliinngippata.

Imm. 4. Imm. 1 malillugu eqqartuussinikkut pineqaatissiinerni nikanarsaanerup annertussusiata, pineqaatissiissutissatut aalajangikkat kiisalu inuup allap soqutigisaasa akornanni attuumassuteqaatit eqqartuussiviup eqqarsaatigissavai.

§ 44 a. Eqqartuussinermi §§ 43 imaluunniit 44 malillugu inummik pineqaatissiisimaneqartillugu, eqqartuussivik piumasaqarfigineqarnikkut aaljangiisinnaavoq, eqqartuussissut tamakiitillugu imaluunniit imaqarniliorlugu tamanut nalunaarutigineqassasoq.

Imm. 2. Tamanut nalunaarutiginninnermut pisussaaffik nikanarsaasup akisussaaffigaa. Tamanut nalunaarutiginninneq nikanarsaasup akiligassaatut pissaaq, imallu naammaginarumk piumasaqaateqarluni erseqqitsigisumik pissalluni.

§ 45. Nioqputissat ilisarnaataanik atuinissamut akuersissummik tunniussineqarsimappat, akuersissummik tunniussisoq taamallu akuersissummik pissarsisoq nioqputissat ilisarnaataanik atuisinnaatitaanermik nikanarsaaneq pillugu suliassani unnerluutigineqarsinnaasutut naatsorsuunneqassapput allatut isumaqatigiissuteqartoqarsimangippat.

Imm. 2. Akuersissummik pissarsisup suliassanik eqqartuussivikkoortitsiniartup akuersissummik tunniussisoq tamanna pillugu ilisimatissavaa.

§ 45 a. Ilanngaaserisut akileraaruserivillu nikanarsaanernik § 42-mut ilaatinneqartunik pasitsaassaqarunik, tamanna pillugu paasissutissat pisinnaatitsissummik pigisaqartoq nalunaarfigissavaat.

Kapitali 7

Aalajangersakkat assigiinngitsut

§ 46. Inatsit manna malillugu Patent- og Varemærkestyrelsenip aalajangigai Patentankenævnet-imut (Ankenævnet for Patenter og Varemærker) ingerlateqqinneqarsinnaapput, tamannalu pissalluni aalajangigaaq pineqartumut nalunaarutigineranit kingusinnerpaamik qaammatit 2-t qaangiutsinnagit. Piffissap taassuma iluani maalaaruteqarnerup suliarineranut akiliut akilerneqassaaq. Akiliisoqanngippat maalaarutigineqartoq itigartinneqassaaq. Patentankenævnetimut ingerlatitseqqinneq salluutinneqartussatut sunniuteqassaaq.

Imm. 2. Ankenævnetip aalajangigai allaffissornikkut oqartussanut qulliunerusunut ingerlateqqinneqarsinnaanngilaq.

Imm. 3. Patent- og Varemærkestyrelsenip aalajangigai ankenævnetimut maalaarutigineqarsinnaasut, eqqartuussivinnut ingerlateqqinneqarsinnaanngillat ankenævnetip

aalajangigai saqqummiunneqareersinnagit. Ankenævnetip aalajangigai eqqartuussivinnut misiliilluni suliaqkiissutigineqassapput aalajangiinerup pineqartumut nalunaarutigineqareerneratigut qaammatit 2-t qaangiutsinnagit. Tunniussineq salliutinneqartussatut sunniuteqassaaq.

§ 47. Patent- og Varemærkestyrelsen piumasaqarfigineqarnikkut suliassat immikkut ittut, nioqqutissat ilisarnaataannut aammalu nioqqutissat ilisarnaataannik atuisinnaatitaanermut tunngasut iluarsiniarsinnaavai.

Imm. 2. Tamatumunnga akiliutissaq pillugu aningaasarsiornermut inuussutissarsiornermullu ministerip malittarisassiuussinnaavai.

Imm. 3. Ingerlatsinermi ammasuunissaq pillugu inatsit atuutissaq, § 4, imm. 2 pinnagit, kiisalu suliassat imm. 1-imi taaneqartut aamma pinnagit.

§ 48. Nioqqutissat ilisarnaataannik qinnuteqaatit taakkulu suliarineqarnissaat pillugit aningaasarsiornermut inuussutissarsiornermullu ministerip erseqqinnerusumik malittarisassiuussinnaavai. Tamatumunnga ilutigitillugu aalajangerneqarsinnaavoq Patent- og Varemærkestyrelsen nammineq piumassutsiminik qanoq eqqumaffiginnittoqartigissanersoq, nioqqutissat ilisarnaataannik nalunaarsuisarnermi piumasaqaatit pigineqarnersut. Taamattaq aningaasarsiornermut inuussutissarsiornermullu ministerip makku pillugit malittarisassiuussisinnaavoq; qinnuteqaatinik nalunaarsuinerinillu avitsineq, maalaarutiniq suliarinnittarnej aamma allaffissornikkut atorunnaarsitsinerit, salliutitaasussaataitanermik nalunaarutiginninnerit, tak. §§ 18 aamma 19, nioqqutissat ilisarnaataannik nalunaarsuineq piiaasarnerlu kiisalu suliarinnittarnerit, nalunaarutiginnittarnerit, nalunaarsuutiniq allaganngortitsinerit il.il.

Imm. 2. Aningaasarsiornermut inuussutissarsiornermullu ministerip makku pillugit erseqqinnerusumik malittarisassiuussisinnaavoq; nalunaarsuutit ilusilernerat suliarisarnerallu, paasissutissat suut nalunaarsuutitut allanneqarsinnaanersut, kiisalu nalunaarsuutiniq il.il. tamanut nalunaarutiginnittarnerit.

Imm. 3. Aningaasarsiornermut inuussutissarsiornermullu ministerip makkununnga akiliutissat aalajangersinnaavai; qinnuteqaatinik nalunaarsuutiniq avitsinerit, suliarinninnermut, nalunaarutiginninnermut, naqitanngortitsinerit il.il. Annigaasarsiornermut inuussutissarsiornermullu ministerip akiliutit pineqartut utertinnissaat il.il. pillugit malittarisassiuussisinnaavoq.

Imm. 4. EF-imi nioqqutissat ilisarnaatit pillugit Peqqussutip atorneqarnissaanut pisariaqartitat pillugit aningaasarsiornermut inuussutissarsiornermullu ministeri malittarisassiuussisaaq, tamakkununnga ilaallutik EF-imi nioqqutissat ilisarnaataannik qinnuteqarnermut nalunaarsuinerinillu aalajangersakkat nunami immi qinnuteqaatinut ikaarsaariartitsinerit, suliarinnittarnerit, nalunaarutiginnittarnerit il.il. kiisalu tamakkununnga akiliutit.

Imm. 5. Aningaasarsiornermut inuussutissarsiornermullu ministeri erseqqinnerusumik malittarisassiuussisinnaavoq ullut suut Patent- og Varemærkestyrelsenip matoqqaffiisut isigineqarsinnaanersut.

§ 49. Aningaasarsiornermut inuussutissarsiornermullu ministerip inatsit malillugu pisussaaffini Patent- og Varemærkestyrelsenimut tunniukkunigit, maalaarsinnaanermut malittarisassanik ministerit aalajangiisinnaavoq, tamakkununnga ilaallutik maalaarutit allaffissornikkut oqartussanut qulliunerusunut ingerlateqqinneqarsinnaanngitsut.

Kapitali 8

Nioqutissat ilisarnaataannik nunani tamani nalunaarsuisarneq

§ 50. Nioqutissat ilisarnaataannik nunani tamani nalunaarsuisarnermi eqqarsaatigineqarput, nioqutissa ilisarnaataannik nunani tamani nalunaarsuisarneq pillugu Madridimi 14. april 1891-imi isumaqatigiissutit akuerineqarsimasut, kingusinnerusukkut nutarterneqartartut (Madridimi aaqqiineq) imaluunniit Madridimi aaqqissuussinermut allakkiat 27. juni 1989-imi akuerineqartut naapertorlugit.

Nunani tamani nalunaarsuinerit sunniutaat

§ 51. Ullormit nalunaarsuiffiusumit imaluunniit ullormit tamatuma kingorna toqqaaffiusumit nunat tamat nioqutit ilisarnaataannik nalunaarsuinerit, tassani Danmark toqqarneqarfiulluni, ilisarnaat Danmarkimi nalunaarsorneqarfiusutut inatsisitigut assinganik sunniuteqartussaavoq.

Itigartitsinerit

§ 52. Patent- og Varemærkestyrelsen piffissaliussaq Madridimi aaqqiissummi imaluunniit Allakkiani aalajangerneqartoq nallertinnagu, ilisarnaatip Danmarkimi atuussinnaassuseqarnera pillugu International Bureau-mut tamakiisumik ilaannakortumilluunniit itigartitsissuteqarsinnaavoq, ilisarnaat inatsit manna malillugu nalunaarsuinissamut piumasaqaatit eqquutsinngippagit, imaluunniit akerliliissummik saqqummiussisoqarsimappat.

Danskit inatsisaanni atorunnaarsitsisarneq ingerlatseqqittarnerlu

§ 53. Nioqutissat ilisarnaataannik nunani tamani nalunaarsuisimaneq atorsinnaajunnaarsinneqarpat, taassuma Danmarkimi atorsinnaassusia aamma piissaaq, tassalu nunani tamani nalunaarsuinerup atorunnaarsinneqarnerani piffissaq aallarnerfigalugu.

Imm. 2. Allakkiq malillugu nunani tamani nalunaarsugaq oqartussatut nalunaarsueqqaarfiusumit piumasaqarneq malillugu atorunnaarpat imaluunniit isumaqatigiissuteqarfigisaaq Allakkiamit peqataajunnaarpoq, piginnittuusooq Danmarkimi nioqutissat ilisarnaataannik qinnuteqarsinnaavoq, qinnuteqaat nunani tamani nalunaarsorneqarnissamut tunniunneqarnerani ulluani tunniunneqarfiani assinganik sunniuteqartussaalluni imaluunniit kingorna toqqarneqarfianut ullormit, makku eqquutsinneqarpata

- 1) qinnuteqaat pineqartoq tunniunneqarsimassaa ullup piarneqarfiata qaangiunnerani kingusinnerpaamik qaammatit 3-t qaangiutsinnagit tunniunneqarpat
- 2) qinnuteqaammi nioqutissat imaluunniit sullissinerit allat ilanngunneqarsimangippata, taamaallaat nunani tamani nioqutissat ilisarnaataannik nalunaarsuinissaq, aamma
- 3) qinnuteqaatip danskit nioqutissat ilisarnaataannik qinnuteqarnissamut piumasaqaatit eqquutsinneqarpata, qinnuteqartullu akiliutissat piumasarineqartut akilerneqarsimappata.

Marloqiusamik illersuinissamut inerteqqusiineq

§ 54. Nioqutissat ilisarnaataat Danmarkimi nalunaarsorneqarsimasup saniatigut ilisarnaammik piginnittup piumasaqarneratigut nunat tamat nioqutissat ilisarnaataannik

nalunaarsuinissaq peqqutissaqartippagu, nunani tamani nioqqutissat nalunaarsorneqarnerat atuutilissaaq, danskit nalunaarsuinerannut taarsiullugu, ima pisoqarsimappat

- 1) Danmark aallaavittut imaluunniit kingusinnerusukkut nalunaarsuiffineqarsimappat
- 2) nioqqutissat imaluunniit sullissinerit danskit nalunaarsuiffiannut ilaatinneqartut, aamma nunat tamat nalunaarsuiffiannut ilaatinneqarpat
- 3) danskit nalunaarsuiffiannut qinnuteqaatip ulluata kingorna Danmark nalunaarsuiffiusimappat

Imm. 2. Patent- og Varemærkestyrelsen piumasaqarfigineqarnermigut nalunaarsuutimini allasavaa, nunat tamat nioqqutit ilisarnaataanik piginnittoqartoq.

Danmarkimi qinnuteqaat imaluunniit nalunaarsuineq tunngavigalugu nioqqutissat ilisarnaataata nunani tamani nalunaarsorneqarnissaanik qinnuteqaat

§ 55. Nioqqutissat ilisarnaataat pillugu nunani tamani nalunaarsornissaanut qinnuteqaat Danmarkip naalagaaffiani innuttaasunit tunniunneqarsinnaavoq kiisalu inuit tigussaasut imaluunniit inuit inatsisitigut suliallit Danmarkimi najugaqartunit imaluunniit Danmarkimi suliffissuaqarnikkut imaluunniit aningaasarsiornikkut suliffeqarfimmik piginnittuusunit.

§ 56. Nioqqutissat ilisarnaataannik nunani tamani qinnuteqaatit imaluunniit tamauma malitsigisaanik Danmarkimi qinnuteqaataasinasoq imaluunniit nalunaarsuisimaneq tunngavigalugu nalunaarsuisitsiniarneq Patent- og Varemærkestyrelsenimut tunniunneqassaaq aalajangersakkat aningaasarsiornermut inuussutissarsiornermullu ministerimit aalajangersarneqartut naapertorlugit, tak. § 60.

§ 57. Nunani tamani qinnuteqaammi taamaallaat pineqarsinnaapput nioqqutissat imaluunniit sullissinerit Danmarkimi qinnuteqaammi imaluunniit nalunaarsuinermit pineqartut.

§ 58. Nioqqutissat ilisarnaataat pillugu nunani tamani qinnuteqaammik tunniussinermit naalagaaffiit Parisimi isumaqatigiissutaat naapertorlugu salliutitaanissaq piumasarineqarsinnaavoq.

Nutarterineq il.il.

§ 59. Nutarterineq pillugu maleruagassat Madridimi aqqissuussinermit aammalu Allakkiami aalajangersarneqarsimasut atortuutinneqassapput.

§ 60. Aningaasarsiornermut inuussutissarsiornermullu ministeri kapitalimi matumani aalajangersakkanik naammassinninniarnissaut erseqqinnerusunik maleruagassiuussissaaq. Tamakkununnga ilanngullugit aalajangersarneqarsinnaapput nioqqutissat ilisarnaataasa nunani tamani nalunaarsukkat tamanut nalunaarutigineqartarnerat pillugu maleruagassat immikkut ittut, tak. § 51, aammalu tamatumunnga akerlilisoqartarnek pillugu maleruagassat, tak. § 52. Taamattaq aningaasarsiornermut inuussutissarsiornermullu ministeri tamatumunnga atatillugu suliaasanik aalajangiiffiginninnermut akiliutissat pillugit malittarisassiorsinnaavoq.

Kapitali 9

Atortuulersitsinermik aammalu ikaarsaariarnermi aalajangersakkat

§ 61. Aaqqiissut atortuulissaaq 1. juli 2010. Kapitali 8-mi aalajangersakkat atuutilissapput aningaasarsiornermut inuussutissarsiornermullu ministerip nalunaaruteqarneratigut.

§ 62. Malittarisassat nioqqutissat ilisarnaasersorneri pillugit inatsit malillugu aalajangersarneqarsimasut aamma Kalaallit Nunaannut atuupput.

Christiansborg Slot-imi tunniunneqarput, den 11. juni 2010

MARGRETHE R.

/ Lene Espersen